



Jorggáhalla Kanadas

Lávvordaga čájehuvvo sámi dánsa inuihtalávdis Davvi-Kanadas. Sámi dánsejeaddji ja koreográfafa Elle Sofe Henriksen beassá doppe de jorggáhalla.

Go Riddu Riđđu searvá eamiálbmotfestiválaide ja doaluide eará sajis máilmmis de lea maid ulbmil ráhkadit geainnu sámi artisttaide. Dál lea geaidnu Kanadai, ja doppe galgá dánsačájalmas «Jorggáhalla» čájehuvvot lávvordaga.

– Lea guokte jagi áigi go oahpásnuvaimet Alianait festivála jodiheddjiin Kanadas ja leat dan rájes bargan dainna ahte beassat sáddet muhtin sámi artistta Kanadai. Leat leamašan mánga čoaikkima ja sii leat fitnan min luhtte. Dál viimmat lea šaddan dat duohtan, lohka Riddu Riđu jodiheddji, Kirsti Lervoll.

– Lea issoras somá go Riddu Riđu nagoda gávdnat lávddiid sámi artisttaide ja beassá sin sáddet stuora máilbmái, lohka son.

– Artista oazžu maid vejolašvuoda maid ieš ii livčče soaitán olahit go gávdnojit lávddit maid artisttat eai oaba dieđege gávdnojit. Artisttat lávejit hui movttegin šaddat go ožžot jearaldaga áigot go vuolgit mátkái, lohka Kirsti Lervoll.

Illuda vuolgit Kanadai

– Gal jur dat gal lea oaba somá go beassan vuolgit Nunavuthii Kanadai čájehit sámi dánssa. Lea vuosttaš gearde go galggan «Jorggáhalla» čájehit Kanadas, lohka Elle Sofe Henriksen.

Elle Sofe Henriksen lea olles áigge dánsejeaddji ja son lea maid ieš ráhkadan bihtá «Jorggáhalla» mainna lea vuolgime Kanadai.

– Somá maid dan dáfus go lea inuihtabáiki ja eará álgoálbmotbáiki, go dat mearkkaša hui ollu munnje, lohka Elle Sofe Henriksen.



Jorggáhalla dánsejeaddji ja koreográfafa Elle Sofe Henriksen ja dánsejeaddji Thomas Lægroid Gundersen. Elle Sofe lohka son lea jearahalla vuorrasiid olbmui jorggáhalla birra ja de lea ráhkadan daid vuodui dánsabihtá. Preassagovva: Lars Öberg

– Dánsen lea dakkár mii addá hui buori dovdu go geahččit leat ieža nu mielde. Váikko dánsemis ii adno giella de olmmoš dego ipmirda goitge kulturrájiid, lohka son.

Lervoll muitala Riddu Riđu lea

hui njunnošis álgoálbmotmáilmmis.

– Riddu Riđu ii leat stuorimus festivála, muhto mun oaivildan dat lea mávssolaččamus danne go mii váldit vára álgoálbmotdáidagis sihke iežamet lávddis ja maid eará lávddiin maiguin mii ovt-

tasbargat sihke Norggas ja muđui máilmmis.

– Min lagas ovttasbargu Norgga ambassádaiguin iešguđet riikkas lea dávjá leamašan stuora veahkkii konsearttaid ja čájalmasaid lágidemiid oktavuodas feara gos máilmmis,

lohka Kirsti Lervoll.

Elle Sofe Henriksen lei diibmá dánsenčájalmasain mielde dánsenmaratonas Kamchatkas.